

ИМАНЫНЪ РУКЮНЛЕРИ

Пейгъамбер Эфендимиз салляллаһу ‘aleyһи ве селлем бир Хадис-и Шерифинде буюрды:

(الإيمانُ أنْ تُؤْمِنَ بِاللَّهِ وَمَلَائِكَتِهِ وَكُتُبِهِ وَرُسُلِهِ وَالْيَوْمِ الْآخِرِ وَتُؤْمِنَ بِالْقَدَرِ
خَيْرِهِ وَشَرِّهِ)

Бу Хадис-и Шериф, Аллаһкъа, Аллаһнынъ Мелеклерине, Китапларына, Пейгъамберлерине, Ахирет кунюне, Къадерге, яхшылыкъ ве яманлыкъ Аллаһтан кельгенине инанмакъ кереклигини бильдире.

Аллаһкъа иман этмек – бу Аллаһнынъ барлыгъында шубхе этмейип, Онынъ ортагъы олмагъанына, Онынъ башлангъычы ве сонъу олмагъанына, Онынъ ич бир шейге бенъземегенине, Оны акъыл ве фикирнен тасаввур этиледжек киби олмагъанына инанмакъ керектир.

Аллаһу Те‘аля ич кимсеге ве ич бир шейге мухтадж олмагъанына, кок ве ерге мухтадж олмагъанына, Аршкъа мухтадж олмагъанына, ерсиз бар олгъанына, кокте ве ерде олмагъанына, Аршта отурмагъанына ве ич бир ерге мухтадж олмагъанына инанмакъ керектир.

Аллаһу Те‘аля джисим олмагъанына, Онынъ сынъырлары олмагъанына, О алты тарафтан къушатылмагъанына, Онынъ органлары, яни эль, аякъ киби азалары олмагъанына инанмакъ керектир.

Аллаһу Те‘аля эр шейни эшиткенине ве корьгенине, Онынъ эшитмеси ве корьмеси, бизим эшитме ве корьмемизге бенъземегенине, яни Онынъ эшитмеси ве корьмеси къулакъ ве козь киби азаларнен олмагъанына инанмакъ керектир.

Аллаһнынъ Келямы тиль киби бир аза иле олмагъанына, бир де бир миллет тили, яни тюркче, арапча я да алманджа олмагъанына, сес ве ариф иле олмагъанына, Онынъ Келямы яратыкъларнынъ келямына бенъземегенине иман этмек керектир.

Аллаһнынъ Хаяты рух, къан ве эт иле олмагъанына, Онынъ Хаяты бизим хаятымызгъа бенъземегенине, О эзелий (башлангъычсыз) ве эбедий (сонъсуз) олгъанына инанмакъ керектир.

Аллаһ, энъ кучюк зерреден ве энъ буюк джисимлерден олгъан Аршкъа къадар эр шейни ёкътан бар эткенине, джисимлерни ве амеллерни ёкътан бар эткенине, О эр шейге къадир олгъанына, истегенини япкъанына, ич кимсе Онъа къаршы чыкъалмагъанына, истегени олып, истемегени олмагъанына, Онынъ истеги денъишмегенине, О кечмиште олгъаны ве келеджекте оладжагъыны эписини бильгенине иман этмек керек.

Аллаһнынъ Ресуллерине иман этмек – бу Абдуллаһ огълу олгъан Пейгъамбер Эфендимиз Мухаммед алейһиссалату весселям инсанларгъа ве джинлерге йиберильгенине, Меккеде догъгъанына, анда онъа ильк вахий кельгенине ве даа сонъра Аллаһнынъ эмири иле Мединеге хиджрет эткенине ве Меккеден къачмагъанына иман этмек керек.

хиджреттен он сене сонъра Айше анамызнынъ эвинде вефат эткенине ве анда джыйылгъанына иман этмек керек.

Пейгъамбер Эфендимиз кечмиш ве келеджек акъкъында нелер анълаткъан олса, буларгъа иман этмек керек, чюнки буларнынъ эписи вахийдир.

Бутюн Пейгъамберлер мусульман олгъанына ве инсанларны Исламгъа чагъыргъанларына, яни ильк Пейгъамбер Адем ‘aleyһиссалату весселямдан башлап, сонъки Пейгъамбер Мухаммед ‘aleyһиссалату весселямгъа къадар кельген эписи Пейгъамберлер инсанларны Ислам динине давет эткенлерине инанмакъ керек.

Бутюн Пейгъамберлер, пейгъамберликтен эвель ве сонъра куфюрден (динден чыкъарткъан шейлерден), буюк гунаһлардан ве ашалайыджы кучюк гунаһлардан къорчалангъанына, яни догъгъанындан вефат эткенине къадар бойле хата япмагъанларына иман этмек керек.

Ич бир Пейгъамбер йылдызгъа, айгъа я да кунешке табынмагъанына, зинагъа ниет этмегенине я да зина япмагъанына, къадынларгъа тюшкюнлиги олмагъанына ве бир къадын ичюн ич кимсени ольдюртмегенине инанмакъ керек.

Ич бир Пейгъамбернинъ беденинден къуртлар чыкъмагъанына, ич бириси сакъавланмагъанына ве Пейгъамберлернинъ эписи дюльбер юзьлю, гузель лаф эткенлерине ве беденлери гузель олгъанына инанмакъ керек.

Ибраһим алейһисселям йылдызгъа, айгъа ве кунешке табынмады, догъгъанындан берли мусульман эди, Раббини таный эди ве мушриклерден дегиль эди.

Юсуф алейһисселям зинагъа ниет этмеди ве зина этмеди.

Давуд алейһисселямнынъ къадынларгъа тюшкюнлиги ёкъ эди ве о, бир къадын ичюн ич кимсени ольдюртмеди.

Эййюб алейһисселям игренч хасталыкъкъа огърамады.

Муса алейһисселям сакъавланмады ве онынъ агъыз хасталыгъы ёкъ эди.

Пейгъамбер Эфендимиз Мухаммед ‘алейһиссаляту весселям къадын тюшкюни дегиль эди.

Аллаһнынъ Мелеклерине иман этмек – бу, Аллаһ Мелеклерни нурдан яраткъанына, Мелеклернинъ энъ аз эки къанаты олгъанына, эркек я да къадын олмагъанына, Мелеклер ашамагъанларына, ичмегенлерине, юкъламагъанларына ве эвленмегенлерине иман этмек керек.

Ич бир Мелек Аллаһкъа исъян этмегенине ве Онынъ бутюн эмирлерини эксиксиз ерине кетиргенлерине иман этмек керек.

Мелеклер, Аллаһнынъ ярдымджылары олмагъанына инанмакъ керек, чюнки Аллаһ ич бир шейге мухтадж дегиль.

Аллаһнынъ Китапларына иман этмек – бу, Аллаһнынъ йиберген Китапларнынъ эписине иман этмек керек. Олар чокътыр, лякин мешхур олгъанлары дёрт танедир. Булар Зебур, Теврат, Инджиль ве Къур‘ан-и Керимдир. Бу айтылгъан дёрт Китаптан Къур‘ан-и Керимден гъайры башкъа учь Китап къафирлер тарафындан деньиштирильгендир.

Ахирет кунюне иман этмек. «Ахирет куню» ве «Къыямет куню» ибарелернинъ манасы бирдир. Олюлернинъ къабирлеринден чыкъмасынен башлап, Дженнетни къазангъанлар Дженнетке, Джеһеннемни къазангъанлар Джеһеннемге ерлешкендже къадар оладжакъ вакъыткъа «Ахирет куню» айтылыр. Ахирет кунюне ве онда оладжакъ Тирильме, Хашр (инсанларнынъ топланмасы), Эсап, Сыраткъа иман этмек керек.

Къадерге, яхшы ве яман олгъан шейлернинъ Аллаһтан олгъанына иман этмек. Хайыр ве шер Аллаһнынъ истеги иле олгъанына инанмакъ керек. Факъат Аллаһ тек яхшы амеллерни север ве ярамай амеллерни севмез.

Бу инанч Пейгъамбер Эфендимиз Мухаммед ‘алейһиссаляту весселямнынъ ве Эһл-и Суннетнинъ инанчыдыр. Лякин бир кимсе Ислам Дининден чыкъаргъан шейлерге инанса, мисаль, Аллаһкъа ляйыкъ олмагъан бир шейге инанса, Онынъ кокте булунгъанына я да Аршнынъ устюнде отургъанына инанса, я да Пейгъамберлерден бири акъкъында оларгъа ляйыкъ олмагъан бир шейге инанса, Пейгъамберлерден бири куфюр ишлегенине, буюк гунаһ я да ашалайыджы кучюк гунаһ ишлегенине инанса, о киши мусульман дегиль, чюнки куфюрге тюшкендир.

Куфюрге тюшкен кишининъ япаджагъы биринджи шей – куфюрден чыкъмакъ ниетинен аман Келиме-и Шеһадетни сёйлемек я да айны шу манада олгъан башкъа бир ибарени сёйлемектир.

Келиме-и Шеһадетнинъ арапчасы:

Арапча айтып оламаса, бойле ибарени айтмакъ мумкюн: «Шеһадет этем ки Аллаһтан башкъа Иляһ ёкъ ве шеһадет этем ки Мухаммед Аллаһнынъ Ресулюдир».

Келиме-и Шеһадет айтылгъан вакъытта мытлакъкъа «Аллаһ», «Иляһ» ве «Мухаммед» сёзлери догъру бир шекильде айтылмакъ керек. Эгер янълыш айтылса, Ислам Динини къабул эткен олмаз.

Догъру теляффузда – «Аллаһ» ве «Иляһ» сёзлеринде экинджи эджада [а] сесининъ узатмакъ керек. «Мухаммед» сёзюнде [х] сесини гъыртлакътан чыкъармакъ керек. «Мухаммед» сёзюни догъру айтып оламаса, «Абуль Къасим» яни «Къасимнинъ бабасы» (Мухаммед Пейгъамберимизнинъ Къасим адлы огълу бар эди) айтмакъ керек. Эгер «Къасим» айтып оламаса, «Абуль Гасим» айта биле. «Абуль Гасим» дегенде «Гасим» сёзюнде [а] сесини узатмакъ керек.

Куфюрден Исламгъа тек бу шекильде кирмек мумкюн, башкъа шекильде олмаз. Яни куфюрге тюшкен сонъ «Эстагъфируллаһ» демекнен Исламгъа кирмек олмаз. Исламны къабул этмек анджакъ Келиме-и Шеһадетни айтмакънен олур.